

## Fontanini: «Destinâ il 5 par mil ae Universitât di Udin»

**D**estinâ il 5 par mil dal Irpef ae Universitât dai Studis di Udin». Al è l'apel fat vuê dal president de Provincie on. Pietro Fontanini a pro dal ateneu furlan. «Il moment dificil al à di sburtâ ducj i citadins furlans a une riflession – al sotlinie Fontanini -: come che 30 agns indaûr e fo une mobilitazion populâr pe sô nassite, vuê e je la necessitât di dâsi di fâ pe sô funzionalitât. La universitât e rapresente un strument di fonde pe cressite e il disvilup dal teritori e la nestre e je stade volude de int cuntune racuelte di 125 mil firmis. Ducj o vin di fâ la nestre part par un dai tocs plui impuartants dal Friûl. Il 5 par mil nol sarà une cifre che e risolvârà ducj i problemis ma – al continue -, al sarà un segnâl impuartant dai furlans, de lôr vicinace e atenzion ae sô

universitât». Pôc plui di un an indaûr, a pet dai tais ministeriâi che a assegnavin a Udin finanziaments al di sot des sôs dimensions, il mont politic, econo-

**Al è l'apel che il president  
al fâs a ducj i citadins  
de provincie  
a pro dal ateneu furlan**

mic, sociâl e religjôs si mobilitave sotscrivint un pat a sostegn de Universitât. «Rispiet al 2008 la situazion e je simpri delicade – al ribat Fontanini – ma a van regjistrâts impuartants pas indevant: l'impegn de retore Cristina Compagno tal meti in sigurece il bilanç cuntun sparagn di plui di 2 millions di euros, lis singulis iniziatis des diviersis parts in cause. La Provincie – al à ricuardât – e confermarà il so sostegn al ateneu furlan mantignint intate la cuote di finanziament anuâl e e sta valutant la pussibilitât di previodi ae manutenzion ordenarie dai imobii dal ateneu. La Universitât di Udin e à savût radicâsi e ramificâsi ben dilà dal so ambit di origjin. Une lungje strade e je stade tacade – al à concludût – e par nô al è dovût garantî a chest ent une cressite che e sedi proporziônâl ai risultâts cualitatîfs e cuantitatîfs otignûts».

